

Basef Ifimba Pol Nali' Nanda'ef Fagafe'ma Timotii

Basef bandafi Pol nali' nanda'ef fagafe'ma Timotii

1:1-2 Pol na'i God noloma Jisas Kraiis motopalopa Timoti

1:3-20 Pol na'ipa Timoti ma nugalutu banagona ma amom
magambaso'ami, maga'ipas dindinipa sigaila waf fowa'ifii

2:1-15 Waf bu'wafi esis Kristen sonda' lotuwafi

3:1-16 Waf amom agufumi ma siosi moloma magatopalopa agufumi
mogailafi

4:1-6:21 Pol na'ipa Timoti ma waf hiafi bu'wafi anen nonda'afa
nogatopalopa esis Kristen hiasi hi'igalas

1 ¹Ae' Pol anda' pas isi'i. God nowambilai apa' mutanimai mope
andeande' ea' mape mohafa anaf owagama mugati Kraiis Jisas.
Amom biam mandandepa ma'ipi dindinipa agape aposel Kraiis Jisasi.^a

²Ae' anda'menago basef ifimba ina' Timoti, ina' nahapifa God dei'
nataga nogame ae'inai endilisi. Ae' a'i God noloma Kraiis Jisas dembinai
afa'inai muti uwahipina motopalopena dowaf mowa' banagaena, opaf
ine'ifi fope sa'ombel.^b

Apa' mohagofa basef baso'afi hiafi

³Fowa' ae' afo'o itap lu'upa Masedonia ma aga'ipina dei' na'amba atin,
a'ipina wapani. Ina' ata' nendape atapina na'amba Efesusa niga'ipa anom
amam dindinipa ina a' mi'ipasa anif basef baso'afi, owa'i. Mi'ipasa basef
Godi atif.^c ⁴Amom mokwaha basef ambas amamba talimi dowadowafa
basef mamimami hiami saga'i agof isimba bafa'w ifa'w اساسي. Basef
amamba magalalamona nomonas اساسي, magafela ukup اساسي sa'i
basef sandahihianamaefami, amamba ina mogowa' banaga maol Godi,
owa'. Maol inimba natagama mogahapifa God atona.

a 1:1 Ap 16:1-3; Ta 1:4; Kl 1:27 **b** 1:2 Fl 2:24 **c** 1:3 1 Ti 4:7; Ta 1:14

⁵Apa' mu'uli inimba dei' aga'ipipani, i'i esis sohapilan silan, malogof fagape opalef asasilifi nomoni, fa'ipas fihimba'masa waf asasifi ina awef, owa'. Esis sahapifa God endilisi. Ama atiasi waf afamba hiafi fesa'ma ukup pigapigaila God nogaloma anis daias wapani. ⁶Apa' anom amam ukup paso'ama waf afambai bu'wafi. Ea' dei' mololama basef bu'wafi ma'li basef wafifi atif.^d ⁷Amom ma'li mopoma mogawalipas mu'uli Godi si'li anom dembami tisa ma'i, "Basef afa'ifi endilisifi atif." Apa' amom ina mogawa basef ifimba maga'iefi mogawa kofagefa wapania, owa'.^e

⁸I'i apa' mogawa mu'uli Godi milan, na'ambai andeande'. ⁹Apa' mondogawa isimba wapani, mu'uli inimba ina nafi'mai epes isimba sagape andeande'i, owa'atin. Inimba nafi'mai epes sanda' waf awafii, sogosambala mu'uli inimbai owa' sogape lafela amom agufumia. Ea' anis sogowa' alafugaha Godi sanda' waf awafii. Anis saga'li waf Godi hapaifii, ma sagaila waf itapafi atefi. A anis saha ahapas mamasas sagaga'li, saha anis daidaias wapani sagaga'li.^f ¹⁰Anis sanda' so'a wauli ma waf afamba awafii, a anis sagahambombaga anis amam nematawa si'li fowa' Sodom sanda'afi. Ea' anis sakwalopa anis epes sambaho'was sape anis daias safi'li satalisa sonda'mas maol. Ea' anis sambaso'ami, ea' anis sambaso'am saga'li basef endilisi gani ilifi. Ea' anis sanda' waf afambai, faloma anef waf hiafi awafi fapa' fagaloma basef endilisifii. Mu'uli Godi nafi'li naga'li epes isimba sanda' waf awafi.^g ¹¹Basef ifimba fape basef bu'wafi God a nase'ef ae' ma egawalapef. Basef ifimba bu'wafi fa'ipapa God bu'winai endilisi kofagonama dagalai, naloma hiahaom mogogala'li.^h

Pol nanifela Goda nagatopalopana dowaf

¹²Dembina'i ape'inai Krai's Jisas nase'e banagami, okom mapoma ae' bu'uwai anda' maol ananini, nanda'e alutuma maol inimba, ea' anifelona. ¹³Endilisi, fowa' dondol a'li basef anda' salamala agol ananigili, apa' aloma esis Kristen, anda' du'wanigama anen. Apa' ae' ina egawa andeande', owa' ihapifanaia, ea' dei' anda' waf afamba awafima anen atapiwi ape. Isimba atis dei' natolowe uwahipiwi natopalope. ¹⁴Dembina'i ape'inai natopalope dowaf nowa' banagae dei' ahapifana okom maimailana aloma hiasi.ⁱ ¹⁵Anif basef endilisifi atifa epes hiasi some'efa sogahapifif. Basef ifimba na'amba. Krai's Jisas nisila'li itap apa'e ma nofa'apa epes manda' waf awafi mokwahomapaf mutanimai mogape andeande'. Ae' ea' ma'uwi ali' anda' waf awafi ikila' anis daiasi ea' ma'uwi ae' atowe. ¹⁶Isimba atis dei' God na'li uwahipigama ae' ali' ma Krai's Jisas na'li nihimba'masa anen ina okom wandafunama ae' ulal, owa'. Ae' anda' waf awafi ikila' anis daias, apa' owa' anen nape nohafa nogota lautai ma itanima igafi'mai anen. Ama

d 1:6 1 Ti 6:4,20; Ta 1:10 **e** 1:7 Ro 7:12,16 **f** 1:9 Ta 1:9 **g** 1:10 1 Ti 6:15 **h** 1:11 Ap 9:15; Ga 1:15-16; 1 Ko 15:9-10; Ga 1:13 **i** 1:14 Lu 15:2, 19:10

owagama hiasi sogati ae' ma esis wapani sohapifana sogofa' ambal namili sogape andeande' lifilafi.^j ¹⁷Anen dembinai King nagape dondol lifilafii. Anen owa' nogaga'ia, epes owa' la'ifisa sogatolonaia. Anen atona God endilisinai. Ae' a'i agol lu'wagili banagami mogogala'i mondapoma anen atona dondol lifilafi. Endilisi.^k

Timoti nenda' wandaf banagena nendaloma amom boumi

¹⁸Nogame ae'inai Timoti, dei' ase'enago basef ifimba nenda' maolanafi. Ae' okom mandanda'ma basef Godi fowa' amom profet Ambal bu'unai Godi nasa'mam maga'ipinafi. Ina' nila basef ifimba, nenda' wandaf banagambel andeande' neloma esis bousi.^l ¹⁹Wandaf afamba ina' banagena nigahapifa God nenda' waf usi'ifi hilili', ma malogol gagape opaf ina' nomoni ina gihimba'mena anef waf awafi ina' nanda'afi, owa'. Anis epes sowa' alafugaha waf afambai bu'wafi. Ea' dei' hapif asasini papalalan ea' awasin si'i sip palalap pagail otamba awasip pagala naoh.^m ²⁰Epes hiasi sanda' waf afambai, amam biam Himeneusi Aleksander hapif amamini a' awen. Ae' andaiwa'mam ali'amonam mafe' lagof Seteni ma mogogawa gawa fasini. Anda'am na'amba amom ina a' monda' basef findiwaefa agol Godi, owa'i.

Waf afamba betenafi

2 ¹⁻²Maol inimba ae' a'i esa'ma okom ine'imi nenda'ani, basef fagali'i na'amba. Ipa' pendabeten pefala God pihali'ana, pinifelona ma epes hiasi pendabetena anen nogatopalopa esis soloma amom king dembami moloma gavman dembami wapani. Ipa' pendabeten na'amba ma apa' hiapai tol mogape opalef awanelef, mogaila waf Godi usi'if hilili'i.ⁿ ³Beten inimbai bu'wani ma naep Godi, notanima nogofa' apa' mogape andeande'i. I'i apa' monda' waf afambai mondabeten, anen sonahana ma apa'.^o ⁴Anen na'i nofa'i epes hiasi sotanimamai anen sope andeande'ma sogogawa basef endilisifi kofagefa. ⁵Apa' mogawa God atotona nape. Ea' anona aman nagape la'afena God naloma epesi, anamba aman endilisinai anen Krai Jisas.^p ⁶Anen fowa' God nandandepana ea', nakwaha ambal ananili atola natala apa' epes hiapai nakwahomapa waf awafi mogotanimai. Nemaf afamba dondo'afi Krai nihimba'mapa God na'i nowambilai epes hiasi sogotanimai.^q ⁷Ea' dei' God nanda'e ape aposela egawalapa basef bu'wafi ananifi. Ae' a'i endilisi, ina ambaso'am. Anen nanda'e ape dembiwai tisa ma epes anep mini'ap sogololama Godi ma sogahapila basef ifimba endilisifi.

j 1:16 Ro 16:27 **k** 1:17 1 Ti 6:12; Ju 3 **l** 1:18 1 Ti 3:9 **m** 1:19 2 Ti 3:17; 2 Ti 4:14-15; 1 Ko 5:5 **n** 2:1 Ef 6:18; Fl 4:6 **o** 2:3 Esi 18:23; 1 Ti 4:10; 2 Pi 3:9; Ro 3:29-30; Hi 12:24
p 2:5 Ga 1:4 **q** 2:6 Ap 9:15; Ga 2:7-8; 2 Ti 1:11

⁸Ea' dei' ae' a'i epes hiasi walemb hielimbi sondabeten. Ae' okom ma'i esis hiasi sondape bo'wes hilili', sokwaha ukup wandafipi peloma migimigah sondabeten.^r

Basef awo nematawai

⁹Ae' a'i awo nematawa wapani ondanda' klos mais bu'wasi atis, sondahama awo dondo'. Ina onda'as bandabandas a'owa' sotambel bimbitagw, owa'i. Awo ina ondagala sosaf anambai, ofalo'ma balagah alop si'ipa bahigis mamimami hiami moloma sosaf gol fasimi si'i kapai, owa'. Klos isimba sagalotamas a'owa' otamba hiambai owa'i otalisa, hapaisi.^s ¹⁰Apa' nematawa wa'i basef wa'i ogape awasi Godi, awo ondanda' maol bu'wani hiani naninani. Maol inimba si'i sosaf awoufi endilisifi. ¹¹Nemaf mamahefa ipa' penda' lotu main, nematawa awo ondawalipama ogaila waf afamba sa'umbilifi ea' osopama malogofa ogofa' basef andeande'.^t ¹²Ae' ina a'i aho'ma ano'w nemata'w kope dembe'wi tisa kope kwili' kowalepa amoma basef, owa'. Nematawa osopama malogof ondame' basef atif.^u ¹³Basef kofagefa fagape na'amba. Fowa' God nali' nanda' aman Adam, ama main nanda' Iv kwagi'.^v ¹⁴Adam ina nahapifa basef baso'afi, owa'. Nemata'w kwahapifa basef baso'afi, ea' kwataga nemata'w kwanda' waf awafii. ¹⁵Waf nematawa onda'afi afamba. Awo ondahapifa God endilisi ea' ukup pipila anis daias otopalopas, ea' ondape bo'owa hilili'ma ugumafi awo andeande'ma waf awafi akawa.

I'i uhapila waf afamba wilaf atapiwa, God atiasi nokwahomawa waf awafi nofa'awa utanimai ogape andeande'. Ma ogola awasima, atiasi notopalopawa ogolas andeande'.

Basef amom mugumafi siosi

3 ¹Basef ifimba endilisifi. I'i aman ami ni'i nogape dembinai nugumafi esis Kristen sios Godi, anen okom monda'i maol fasini a'owa'.^w ²Ea' aman ami nope nugumafi siosi nondape andeande' a'owa' ma epes ina siti anef waf awafima anen, owa'. Anen noso' nemata'w atoto'w. Ina nea' embel okom moso'ana, owa'. Anen nomonas sondapaona nundumafi alop ananipi andeande'. Anen nindaila okom bu'wami atom nonda' waf hiafi usi'ifi. Anen okom mi'i hiasi alipisi atis ananisi hi'ilas nondaso'as gwa'aisi. Anen nope notaga tisa bu'winai ma basef bu'wafi atif. ³Ina nea' embel banagimbeli hiambel, owa'. Ina okom wandafuna kwafalis, owa'. Nonda' epes sa'ombemas. Ina nohas atin, owa'. Ina okom mi'i moni a'owa'. ⁴Anen numafi awasi waulu'mana andeande',

^r 2:8 1 Pi 3:3-5 ^s 2:9 1 Ti 5:10 ^t 2:11 1 Ko 14:34 ^u 2:12 Jen 2:7,22; 1 Ko 11:8-9
^v 2:13 2 Ko 11:3 ^w 3:1 Ta 1:6-9; Ap 20:28

ea' nonda' awasi ananisi sila basef ananifi, ma sonda' agol ananigili gogape andeande'. ⁵Aman mamahonama owa' nugumafi awasi soloma waulu'mana andeande'ia, anen ina notaga nope agilinai numafi sios Godi, owa'. ⁶Aman anamba nagataga Kristen dambanai ina nope dembinai numafi sios, owa'. Na'amba nonda' du'wanigama God nili'amonana si'i nagali'amona Satan.^x ⁷Aman agol bu'wagilinai ma amam nematawa sogololama Godi, dao' aman anamba notaga nope numafi sios. Apa' anen i'i owa' agol bu'wagilinaia, atiasi anen ambal aola waf awafi ea' nofe' nuwis isag anamba Seteni ea' nofa'ana.

Basef ifimba ma amom magatopalopa agufumi siosi

⁸Ea' na'amba atina amam amamba magatopalopa agufumi siosi, amom ukup pendape usi'ipa maol amamini. Amom ina mi'i malogof biagof, owa'. Ina mea' embel banagimbeli hiambel a'owa' mohagamogaol, owa'. Ea' ina mombaso'mas molomas mofa' otamba anis epesi, owa'. ⁹Basef ifimba endilisifi fowa' fandambahi'i dei' fataga fandawalap alihif, amom mondahapilif sisihif atapif. Ea' malogof fagape opalef amamilifi nomoni fendape hilili' andeande'. ¹⁰Pigali' ata' pegwamba maol amamini. Ama piti monda'an andeande'ma, dao' a' mope monda' maola sios.^y

¹¹Ea' na'amba atina wauhiamam amamuwai ukup pendapaowa andeande'ma maol awo onda'ani. Awo ina ondaha basefa anis, owa'i. Ondape andeande' ina wea' embel numbutimbeli wain hiambel, owa'i. Dondol ondanda' waf bu'wafi atef. ¹²Amam monda' maol siosi, wauhiamam amamuwai ato'w atin. Amom mundumafi awo oloma awasi amamisi andeande'. ¹³Amom mogape monda' maola siosi, i'i monda' maol fasini, atiasi mofa' agof fasigufi. Ama banagem mogowalapa basef bu'wafi, mihimba'mas amom magahapifa Krai Jisasi.

Basef kofagefa ma waf Godi

¹⁴Endilisi ae' a'i efe'mago ina' kwafalis, apa' dei' ata' anda' basef ifimba ina'.^z ¹⁵Ma i'i owa' efo'o etaga ulala, ina' nitigu basef ifimba ea' negawago waf afamba esis sagape andeande'afi ma wambota atamba Godi. Wambota atamba esis sios Godi ambal namili lagapaunai. Sios Godi si'i olaf banagafi fogowa' banaga basef endilisifi.^a ¹⁶Endilisi atis, basef ifimba kofagefa lu'wafi a'owa'. Owa' anin epen la'ifina negegawefa, owa'. Fandabaho' fape fafe' fafe' dei' God nihimba'mafaef alihif. Basef ifimba na'amba.

Anen nataga epen endilisi nofa' alop epesi, nataga nandawalap. Ambal bu'unai Godi nihimba'mapana anen aman bu'unai nagape hilili'i. Amom ensel Godi matolona. Basef ananifi fafe'ma esis wambotagw amam

^x 3:6 2 Ko 8:21 ^y 3:10 Ta 2:3 ^z 3:14 Ef 2:19-22 ^a 3:15 Jo 1:14; Mk 16:19

nematawa hiasi sogololama Godi. Esis epes itapasi sahapifana. Ea' God nofa'ana nalota heven nape mogolala'i ananiami.

Basef ifimba ma epes sagambaso'ami

4 ¹Ambal bu'unai Godi na'i basef alihif na'amba. Anaf owagama anis epes sokwaha sagahapifa basef endilisifi Godi. Ea' aseme' malogofa epes isimba ambagof awami magambaso'ami sila basef ambagof awami maga'iami.^b ²Anom amam magambaso'ami mawalipasa basef ifimba baso'afi. Malogof fagape opalef amamilifi nomoni faso' si'i saofa otamba sagasambagof. Amom ina atiasi ata' momeme'ma waf awafi mogawaf, a' owa'atin.^c ³Atiasi muwalipasa basef ifimba ma esis sigihi'a waf sandaso'amafi sigihi'a anis gwa'aisi epes saga'asi wapani. Apa' gwa'aisi isimba God atona nanda'asa apa' epes mahapifana mogogawa basef endilisifi. Amambai, apa' mofa'am minifela Goda moga'am.^d ⁴Hiahaom hiami God nanda'ami, bu'wami atom. I'i minifelonamam, andeande' mofa'am. Ina mokwahom, owa'. ⁵Dei' main, basef Godi faloma beten sanda' gwa'aisi isimba sataga bo'wes hilili'.

Timoti, nepe aman bu'unai nenda'mana maol Kraisi

⁶Ina' i'i negaso'asa basef ifimba esis Kristen alipisima, dao' atiasi nepe open bu'winai nenda' maola Kraisi Jisasi. Ea' nefa' banagami lu'wami ma basef fagasa'ma hapif ine'inii ma gawa nefa'an nagailani.^e ⁷Apa' esis amam nematawa saga'i numunefisa basef atom wafimi, newa' alafugamam. Ina' nendelafa waf Godi andeande' nendegawam.^f ⁸Ina' negawa, waf afamba niwalipa alop si'ipa ponda' maol pigiawi, isimba la'ifis kwasala ma sogatopalopapa. Apa' ina' nendelafa waf Godi dao', banagef endilisi ma fegatopalopapa ma waf hiafi. I'i ina' nelafa waf Godi, afamba fatopalopa apa' epes hiapai ma dei' magape itap nogota ata'e, ea' fetopalopapa anaf heven wapani.^g ⁹Basef ifi'i endilisifi atifa epes hiasi si'i awi ma seme'ef sogahapififi, ifimba na'amba.^h

¹⁰God anen ambal namili lagapaunai. Anen na'i nowambilai amam nematawa hiasi hi'ilas sotanimai sogape andeande'. Ea' dei' endilisi atis nowambilai epes mamahisa sagahapifanai. Dei' mape mohafana ma'i endilisi nogofa'apa. Isimba atis dei' manda' maol numa'uni endilisi.

¹¹Ina' nese'asago basef ifimba fefe'mago esis amam nematawa, ea' niwalipas dindinipa sigailif.ⁱ ¹²Esis sati ina' ukup pandanda' pa'i, ina' ata' sa'winai, apa' ina si'i ina' aman falafunai, owa'atin. Ina' nendape si'i

b 4:1 2 Ti 3:1; 2 Pi 3:3; 1 Jo 2:18; Ju 18 **c** 4:2 Jen 9:3; Ro 14:6; 1 Ko 10:30-31 **d** 4:3 Jen 1:31; Ap 10:15 **e** 4:6 1 Ti 1:4; 6:20; 2 Ti 2:16 **f** 4:7 1 Ti 6:6 **g** 4:8 1 Ti 1:15 **h** 4:9 1 Ti 2:3-4 **i** 4:11 Ta 2:15

ametal bu'wani ma esis Kristen sigaila waf bu'wafi ine'ifi ma fe', poe, ki, hapif ine'isi, soloma waf afamba okom magaila anis deindeiasafi, soloma waf bu'wafi hilili'i. ¹³Nogota atamba ina' ata' nepe atapina nehafago ae'. Ina' nenda'ago maol banagambela nigatalifa basef Godi alihigima ma epes hiasi, ea' nesa'mago ukup asasipi ma waf sonda'afi ea' niwalipas ni'ipaso andeande'.^j ¹⁴Fowa' agufumi mugumafi siosi mawamona lagofena. Ambal bu'unai Godi nasa'ma manda'mena beten ea' anom amam ma'i basefa presen inimba anen nagasi'inani. Dei' nenda' maol banagen nindimafi presen andeande' inimba God nali' nagase'enan dowafi.^k ¹⁵Dondol ina' nindimafi maol inimba banagena atapina nendapoman. Ama epes hiasi sigati waf ine'ifi feगतaga fasif. ¹⁶Solawaina andeande'ma waf ina' nanda'afi, ma basef ifimba nigawalipasafi. Dondol ninda'am na'amba atapina banagambel. Ina' i'i nenda'as na'amba, atiasi God notopalopena neloma esis sogagahembe'ma basef malogol ine'igili, nowambelega pitanimai pegape andeande'.

Waf bu'wafi fagasindi'amonam amam nematawai

5 ¹Ina nenda' megahogaha amam hagami niga'ipam diga lu'ugai, owa'i. Nisindi'amonam ni'ipam basef sa'umbilifi, nenda'as si'i nanda'manas ahamena ine'inai. Ea' nisindi'amonam amam amamba sa'umi si'i nagasindi'amonam owapena ine'imi.^l ²Nisindi'amonam nematawa hagiwai si'i nagasindi'amonam ma'mena ine'ikwi. Ea' nisindi'amonam nematawa sa'uwai si'i nagasindi'amonam haniti'mina ine'ikwi, ma waf usi'ifi.

Basef ifimba ma nematawa alifiwai

³Basefa nematawa alifiwai faga'i na'amba. Nematawa awamba, i'i owa' anin epen numafiawaea, ina' nendanda'asawa andeande' nimafiawa. ⁴Apa' i'i ano'w nemata'w alifi'wi anis awasi akwa'usi a'a bafasa'w akwa'usi sope esis ata' sondogawa andeande' na'amba. Maol asasini nigali'i sumafi ahasas mamasas asasisi atis ata' sili' ma sogagwa wiaf fowa' sugumafias. Esis sonda'as na'amba saila basef Godi. Aho', God okom ma'iaf a'owa' waf afambai.^m ⁵Apa' i'i ano'w nemata'w alifi'wi ato'w gwaigwai'w kogape, ako'w konda'as na'amba. Ako'w kogawa endilisi God atiasi nogatopalopa'wi ma waf fasifi, kofala God lililafi owamb alipa beten akwa'uni. ⁶Apa' i'i ano'w nemata'w alifi'wi kwila okom akwa'umi atoma kwandagala alop atop dowaf, ako'w si'i kwagaga'i. ⁷Ina' nesa'ma nomonas nematawai ma ugaila basef ifimba, ma awo atiasi ogape hilili'. Ama anin epen ina ni'ipawa ni'i awo wanda' waf awafi, owa'. ⁸Epen ami owa' nigimafi esis esimbel atembel ananisia, anin ina atiasi nimafi esis wambota atota endilisi mamasan ahasan soloma batawisian. Epen

j 4:13 2 Ti 1:6; Ap 6:6, 8:17 k 4:14 1 Ti 5:22 l 5:1 Lev 19:32 m 5:4 Lu 2:37, 18:7

inimba nakwaha hapif a' nataga epen awani endilisi nikila' isimba owa' sogahapifa Godia.ⁿ

⁹⁻¹⁰I'i anowa nematawa wahupawa magaga'awai awo ina onda' so'la waol, owa'. Ope andeande'ma anis daias sotolowa siga'i wagape andeande'i. Onda' maol bu'wani ma ugumafi batawisawa, ogaso'as gwa'aisi epes ogatopalopa esis Kristen wambota Godi, umafi awasi awausi andeande' ope onda' maol hiani bu'wani naninani ofe' ofe' otagama afagof 60-pelaiguf, dao'. Nematawa awamba nenda' agofawa negawawa ma negaso'awa gwa'aisi. Nematawa wanda'as na'ambai atowa ina' nenda' agof awaugufi fil okwatiha negatopalopawa.

¹¹Apa' ina' owa'i nenda' agofa nematawa awamba awo ata' sa'uwai aiawaiwai alifiwai, owa'. Hapewai. Ama nemaf mamahefa awo wi'i ugi'ma nomonas awousi ondagala alop awoupi atop wi'i ogaso' anom amam wapanima dao', ea' diamawago. Awo nomonas isimbai sapaowa, dei' ea' wakwaha wafa basef bu'wafi Kraisi fowa' wagahapilafi. ¹²Dei' wakwaha basef bu'wafi banagafi fowa' wa'if wagaloma Kraisi. Wanda' waf afambai awafi, na'amba kofagefa awoufi.^o ¹³Ea' anef waf awo wanda'afi wapani. Wanda' waf afamba ala'uta tahasa sanda'afi, ea' wafe' wawis ifagw hi'alagw. Awo ina ala'uta tahawa atin dowaf, owa'. Wakwalopa basef anis daiasi wanda'ef pi'ipe'ef wafe'agon hi'alagon. Ea' wawalapa basef fafifafi ina andeande'ma apa' muga'if, owa'.^p ¹⁴Isimba atis dei' a'i nematawa awamba ata' aiawai kwasakwasalai atiasi oso' amam wapani ma ola awasi umafias ogape ifagw awaugwi atogw. A'i awo ina onda' anom maefah awami motagama esis bousi ma siga'i anif basef awafi ma apa', owa'atin. ¹⁵Ina' negawa anowa nematawa wahupawa magaga'i, wakwaha ufiaw fasi'wi wafe' waila Satan.

¹⁶I'i anota wambota nemata'w akwambai ako'w Kristena anowa nematawa alifiwai ope, ea' Kristen akwamba kumafiawa. Ako'w konda'as na'amba esis sios ina noma'w nohasa sugumafawa, owa'atin. Na'ambai andeande'ma sios sugumafi nematawa kwahuwai awo atowa wagapani.^q

¹⁷Agufumi mamahoma mugumafi ipa' Kristen monda' maol andeande'i, ipa' pinifelom penda'am andeande' pimafiam pese'am gwa'aisi mais bif atif mikila' anom deiom. Agufumi manda' maol Godi magawalipasa basef kofagefa ananifi ipa' pindimafiam na'amba atin andeande'.^r ¹⁸Basef fagape Buk Baibeli faga'ias na'amba fa'i, "Ina' owa'i nesopama malogofa bulmakau manda' maol magafa'asa witi, owa'."

Ea' anif basef wapani na'amba fa'i, "Aman nanda' maoli anen nogofa' anis hiahawes du'wanisa maol ananini."^s

¹⁹I'i anin epen atitin ni'i, "Agilinai anamba nugumafi esis Kristeni nonda' waf awafi, ina' owai' neme'anama basef ananifia, hapaini. I'i

n 5:8 Hi 13:2 **o** 5:12 2 Te 3:11 **p** 5:13 1 Ko 7:9 **q** 5:16 1 Ko 16:18 **r** 5:17 1 Ko 9:9; Mt 10:10 **s** 5:18 2 Ko 13:1

epes bias a'a wanis isi'i basef ifimba ma waf awafi anen nanda'afi, dao' ina' neme'as.^{t 20} Apa' i'i anom agufumi monda' waf awafi, ina' nisindi'amonana dindinipa naep esis Kristen hiasi. Ma anis daias ombal mogahasa waf afambai, ma ina sonda' ambambai, owa'.

²¹ Ae' anda'epa ina' andeande'ma nogohnaep Godi naloma Kraisi Jisas maloma amom ensel God nandandepami. Ina' nindaila basef ifimba andeande'. Ina' owa'i ninifala anom sa'umi ni'ipam mehipa. Ea' owa'i nenda' anom dembami sa'ombemam ni'ipam sa'umbela, owa'i. Niga'ipas na'amba atin. Ea' owa'i ninifala anis epesa, a nenda' anis alipisi sa'ombemasa. Niga'ipas na'amba atin. ²² Ina' owa'i nifa'i anona aman kwafalis nenda'ana nope agilina ma esis Kristena, owa'. Nili' negawana, nondondoma anen nanda' waf bu'wafi a'a nanda' waf awafi. Na'amba anis epes sitilina netopalopa anona nanda' waf awafi, si'i ina' wapani nanda' waf awafi. Ina' solawaina ma negape hilili'.

²³ Ina' nekwaha waf afamba nega' embel atembel wafimbel dowaf. Andeande'ma noga' wain kwaia'wina negatopalopa opaf ine'ifi ma negatofa aowas inimba dondol nanda'inai. ²⁴ Waf awafi anis epesi fape alihifa esis fafe' fali'as sogawaf kwafalis atis. Apa' waf awafi anisi fape fandambaho', ama main afataga fandawalap. ²⁵ Ea' na'amba atin, anef waf fasifi wapani fape fandawalap. Apa' anef waf fasifi ina fandawalap ulal, ata' owa'. Afamba wapani ina fandambaho'w dondoli, owa'.

Basefa epes agof akasi sanda' maol dowafi

6 ¹ Ipa' Kristen agof akipai panda' maol dowaf pagape lafela anis daiasi, ipa' ata' ukup pendanda' na'amba. Dembami mugumafi ipe'i, ipa' pinifelam pi'i bu'wami pesa'ma agof amamugufi peme' basef amamifi. Ama anis epes daias ina atiasi si'i basef awafi ma agol Godi, ma waf ipa' Kristeni, owa'.^u ² Ipa' agof akipai panda' maol dowadowafi ma amom agufumi dembami anom Kristen, ipa' ina ukup pendanda' na'amba pi'i, “Anom Kristen sahopafa atom ea' hapaimi, osambala malogof amamugufi.” Owa'atin.

Ipa' ukup pendanda' na'amba pi'i, “Amom Kristen ea' afa' ukup pipilam, onda' maol amamini andeande', ukila' maol wanda'ana amom agufumi owa' Kristenia.” Dei' main, ipa' agof akipai patopalopa amom Kristen ipa' ukup pagapagailami. Timoti, basef ifimba ina niwalipasef nesa'ma ukup asasipi newa' banagas.

Waf endilisifi ma sogofa' hiahaom hiami

Dondol ina' niwalipa esis amam nematawa ma sonda' waf fasifi, ea' nesa'masa sonda'am.^v ³⁻⁴ Basef dembinai Jisas Kraisi fawalipapa

^t 5:19 Ga 2:14; Ef 5:11 ^u 6:1 Fm 16; Ef 6:5 ^v 6:2 2 Ti 1:13; Ga 1:6-9

andeande'ma waf Godi. I'i anona aman nokwaha basef ifimba ma nowalipa esisa anif basef daif owa' fefe' dondo'ma basef ifimba fasisi usi'ifi Jisasia, apa' mogawa aman anamba na'i nonda' du'wanigai. Anen ina nogawa kwasakwasala, owa'atin. Anen nomonas awasisinai. Anen okom manda'i waf afamba nondopambema nogalomasafi atefa, nifitap nondalomasa basef kofagefa. Basef ifimba atif fagawalapa waf afambai. Opalef awalefa anis daindaias, sonda' findiwa, ma sogape ukup aweawep pegapoma sahin owan.^w ⁵Epes isimba sandanda' na'ambai, ukup asasipi paolas endilisi, ea' ina sahapila basef fasifi endilisifi, owa'. Ea' sa'i basef sapa'ef sandahihanama saloma anis. Ea' sa'i, "Ufia'w akwamba Godi ufia'w sogofa' uga'wi."^x

⁶Endilisi atis, epen ami nigaila waf Godi, ma anin okom mondanda'ma hiahaom ananiami ni'i. Ea' ma'um a' dondo'ma anin ea', opaf ananifi fope awanef nepe andeande'.^y ⁷Apa' mogawa, mamamapa olapa magataga itap apa'e, nemaf afamba apa' ina mofa' anom hiahaom mafi'i, owa'. Anaf mogaga' wapani ina atiasi mofa' anom maefah mofe' molomapa itap apa'e, owa'atin endilisi.^z ⁸Apa' anis gwa'aisi luwaguf mais soga'omepa, apa' mi'ias mi'i, "Ea' ma'wis isimba ea' andodo'ma apa'."^a

⁹Apa' epes ukup pape sa'i sogofa' uga maina hianai, esis atiasi sowa ma gwamba anamba aunai, si'i huguf sandowam sambaho'wam magapoma mafisi ma mofe' mowala mopoma sogaham. Ea' atiasi ukup mamimami awami motagamasa hiahaom awami monda' esisa ukup moso'as higiligalas lamonas endilisi.^b ¹⁰Waf afamba ukup piga'i moni a'owa', kofagefa ma waf hiafi awafi. Anis epes ukup lu'um ma'ima'i moni a'owa', ea' waf afambai fahondo'as sakwaha sagahapifa Jisas asafe'ma waf awafi. Ea' sofa' akafimi hiami lu'wami awami a'owa'.^c

Ina' nihapila ambal namili tatala'il nendape lifilafi

¹¹Apa' ina' aman Godi, newa' alafugama hiahawes isimba nefe' nila waf afamba bu'wafi. Ea' nenda' maola negefa' waf usi'ifi endilisifi Godi, nihapifa Jisasa okom mogamogaila anis daias. Ama nigalutu banagena ma waf awafi anis sonda'menafi. Ina' nenda' waf sa'umbilifi ma anis epes daias.^d ¹²Nigahapifa Kraisi si'i anin epen nasagih mehip nagaloma anis. I'i anin nesagih mehip nefe' nikila', atiasi nefa' hiahawes. Ina' wapani na'amba atin. I'i nihapifana banagena, anaf nepe andeande' lifilafi. Ina' nihapila okom amamba ambal fasili lagape dondoli fowa' God nofalena ma negofa'ali. Anen nofalena nemaf afamba ma negawalapa hapif inimba ine'ini naep epes hiasi sanda' lotuma Godi.^e ¹³⁻¹⁴God naso'am ambal

w 6:3-4 2 Ti 3:8, 4:4; Ta 1:14 **x** 6:5 1 Ti 4:8; Fl 4:11-12; Hi 13:5 **y** 6:6 Jop 1:21; Ekl 5:15
z 6:7 Pro 30:8 **a** 6:8 Pro 23:4, 28:22 **b** 6:9 Ef 5:5 **c** 6:10 2 Ti 2:22 **d** 6:11 1 Ko 9:25-26; 1 Ti 1:18; 2 Ti 4:7 **e** 6:12 Jo 18:36-37; Jo 19:11

hiahom hiami ea' Jisas Krai nawalapa basef kofagefa andeande'ma nogohnaep Pontius Pailat gavman dembinai. Naep Godi naloma Jisas Krai dei' ase'ena maol inimba na'amba. Ina' nimafi nomonas ine'isi andeande' nindaila basef ifimba Godi datima. Alogw owa'i gwilifa, ea' epes ina sonda' findiwa ma basef ifimba. Nimafif nendape na'amba atin nefe' netaga afamba Dembinai ape'inai Jisas Krai nogataga alihina.^f ¹⁵Nemaf afamba God naga'iefi nosapa'ana nifi'i. God atona kofagonama dagalai, anen atona Dembinai King nugumafi epes hiasii, soloma hiahom hiami hi'igalami. Anen king Dembinai ma king hiamii, a' Dembinai ma dembami hiamii.^g ¹⁶Ea' anen atona owa' nogaga'ia, nagape mogogala'i lu'wami endilisi. Ea' apa' dei' ina la'ifipama mogafe' felefele'ma anen, owa'. Dei' anin epen owa' netelonaia. Owagama wapani, owa' anin la'ifina nogati anona, owa'atin. Ae' a'i agol ananigili lu'wagili goloma banagami ananiami mondapoma anen atona lifilafi dondol. Endilisi.^h

Basef ifimba ma hiahom hiamisi

¹⁷Ina' ni'ipa epes isimba hiahom hiamisi ma itap ana'e ina sonda' du'waniga sohapifa hiahom amamba mamimami hiami awasim kwafalisi, owa'atin. Ina' ni'ipa epes isimba ma sogahapifa God endilisi, dao' andeande'. Anen atona nagaso'apai hiahom hiami fasimi manda' ukup ape'ipi pagataga sonogahapi. ¹⁸Ina' kipa epes isimba hiahom hiamisi, sonda'ama sogatopalopa maol fasini. Esis dondol sowala hiahawes asasisi sofe'ma anis epes.ⁱ ¹⁹I'i sonda'as na'amba, andeande'ma atiasi sogakolasa hiahom fasimi atom mogatopalopas anaf owagama. Sonda'as na'amba, sogofa' ambal fasili endilisi.^j

Ina' nimafi maol ine'ini andeande'

²⁰O nogame Timoti, ina' solawaina nindimafi basef ifimba God nagase'enafi andeande' datima. Newa' alafugama basef ifimba baso'afi wafifi saga'i basef gawaiifi. Basef ifimbai fa'i fegahambombaga waf Godi.^k ²¹Anis epes sahapifa basef ifimba baso'afi sa'i, "Apa' mogogawai." Apa' owa' dei' sakwaha sagahapifa God andola sape.

Ae' a'i God notopalopepa dowaf nowa' banagaipa. Ea' ma'uf.

f 6:13-14 Diu 10:17; Re 17:14 **g** 6:15 Eks 33:20 **h** 6:16 Sam 62:10; Lu 12:20 **i** 6:18 Mt 6:20 **j** 6:19 1 Ti 4:7; 2 Ti 1:14 **k** 6:20 1 Ti 1:6; 2 Ti 2:18